



enne
sons
tia





22. Mars 1626

LETTRE

24. Jan.

SVR LA MORT
DV R. P. COTON
PROVINCIAL DES
PERES IESVITES.

*A Monsieur de Cheneuou son frere,
Gentil-homme ordinaire de la
Chambre du Roy.*



A PARIS,
Chez EDMÉ MARTIN, rue S. Iaques,
à la Corne de Cerf.

21

M. DC. XXVI.
AVEC PERMISSION.

1821


Case

F
39


326

1626 pe

General Court of the County of
Clerk of the Court



THE MIDDLESEX COUNTY LIBRARY
The County of Middlesex
The County of Middlesex
The County of Middlesex



LETTRE

SVR LA MORT

DV R. PERECOTON
PROVINCIAL DES
PERES IESVITES.



MONSIEVR,

Je ne doute point que la triste
nouuelle de la perte que vous a-
uez faite depuis peu , ne vous ait
grandement affligé , & qu'enco-
res que vous ayez l'ame forte &
preparée à recevoir toutes sortes

A. ij

d'accidens, vostre douleur neant-
moins est si cuisante, qu'il faut
que le temps addoucisse ce que
le discours ne peut pas faire en
vne affliction, qui est capable
d'emporter les plus constans. Car
si apres la mort de ceux à qui
nous deuons nostre naissance, il
n'y a rien de si sensible à l'égal
de la perte d'un bon Frere, & tel
qu'estoit celuy que vous regret-
tez, vous estes certes excusable,
si vous ne receuez pas d'abord
toutes les consolations que vous
peuvent donner vos amis, soit
de bouche ou par escrit. L'esti-
me toutefois qu'il n'y a rien qui
vous doie plus soulager en ce
deuil, que la part que le Public
prend à la calamité particuliere
de vostre maison. Ce n'est pas

aussi vous seul qui perdez en cela. L'Eglise y voit vne de ses Lumieres esteinte, & plaint grandement d'estre priuée du fruiet qu'elle tiroit d'un tel Personnage, la sainte vie, & les mœurs innocentes duquel edifioient, autant que les doctes & elegans Sermons qui l'ont tousiours faict reuerer comme vn des plus celebres Predicateurs de nostre aage. Ce long sejour qu'il a autrefois fait à la Cour auprès du grand HENRY, de glorieuse memoire, fera vne preuue certaine à la posterité de l'eminente vertu qui reluisoit en luy. Car ce ne fut pas sans merite qu'il se rendit digne des bonnes graces d'un Prince qui se cognoissoit si bien auchois des hommes, qu'il ne luy

eust pas voulu fier la direction de sa conscience, s'il ne l'eust iugé capable de gouverner vne chose si precieuse & de tel poids. L'honneur que ce luy fut, apres le deplorable decez de cet invincible Monarque, d'estre employé en la mesme charge, auprès de la sacrée personne du Roy son fils, fut encores vne marque visible de l'estime que ceste Auguste Princesse la Reyne sa mere fist d'une probité si esprouvée. Elle eut aussi ceste ferme creance, & tout le Conseil qui l'assistoit lors, que la ieunesse du Prince ne pouvoit pas estre esleuée en meilleure Eschole, pour y apprendre vne vraye & parfaicte pieté, telle qu'est celle dont la France cueille heureusement le

fruct, par le zele que ce fils aîné de l'Eglise a aux choses saintes, par l'amour qu'il porte à la Religion, & pour l'aduanancement de laquelle nous luy auons veu desia exposer sa vie à toutes sortes de hazards. Tant d'autres actions qui rendoient venerable ce deuot Religieux à toute la Societé, à laquelle il s'estoit voüe & consacré ieune, le font tellement regretter à ses Confreres, qu'ils le pleurent comme leur Pere, & en supporteroient la perte avec toute impatience, n'estoit qu'ils craignent Dieu, qu'ils prennent cette coupe de sa main sans murmure, & resignez qu'ils sont entièrement à sa diuine volonté, ne regardent que luy, & n'esperent qu'en luy, qui seul aussi est

immuable. Ils pratiquent en ceste
 affliction ce qu'eux mesmes en-
 seignent aux autres. Ils voyent
 que la vie de l'homme n'est qu'une
 fleur d'Automne prestee à choir
 au premier vent, que ce n'est qu'
 une fleur d'une matinée, & un
 peu de vapeur dans ses narines,
 ἡ τῶν ὀλίγων φαινομένη, ἥπειτα δὲ ἀφανι-
 ζομένη, laquelle (dit l'Apostre) pa-
 roist pour un peu de temps, & puis
 apres s'esuanoïit & n'est plus. Ils
 sçauent que la figure de ce mon-
 de passe, & qu'il ne reste mesme
 des Grands de la terre apres leurs
 iours que l'odeur des bonnes œu-
 res qu'ils ont faites de leur vi-
 uant, & telle que nous laisse apres
 luy ce digne ornement de nostre
 siecle. Car sa pieté incomparable,
 sa bonté naturelle, la douceur de
 sa

sa conuersatiō, sa grande humili-
té, la sincerité de son ame, sa cha-
rité incroyable, sa constance aux
afflictions, sa deuotion au serui-
ce du Roy, son amour enuers sa
Patrie, & la cordiale affection
qu'il portoit à ses amis, sont au-
tant d'images animées qui le re-
présenteront à nos yeux, comme
s'il estoit encores parmy nous,
puis qu'il viura toujours en l'esprit
& en la memoire de ceux qui
l'ont cogneu, & qui ont eu sa
vertu en veneration. Ce sont là
les statuës qu'il s'est erigé soy-
mesme, pour rendre son nom
immortel, avec les doctes Escrits
qu'il laisse à la posterité, pour
monuments de sa grande erudi-
tion. Si nonobstant tout cela
vous ne laissez pas de le plaindre,

aussi fait toute la Cour avec vous, le Roy par sa bonté ayant esté touché de ceste perte comme de celle d'un de ses plus fidelles seruiteurs. Mais si viuant il m'a dit beaucoup de fois, & mesmement depuis peu, qu'à l'exemple d'un saint Paul, il desiroit d'estre détaché de ses liens, & d'estre avec son Sauueur; certes ie l'estime tres-heureux apres sa mort d'estre en repos, & de se voir affranchy des calamitez d'un siecle corrompu, & duquel il deploiroit la misere, pour n'y voir point de pris à la vertu, comme il eust bien desiré. Benissez donc Dieu de tout, au contentement que ce vous doit estre, que ce cher Frere ait fait vne fin tres-chrestienne, & qui couronne toute sa

viẽ, puis que la seule heure de la mort fait iuger de toutes les années passées. Dauantage vous pouuez (Monsieur) vous donner pour consolation, qu'encores que les Peres Iesuites, que vous auez toujours affectiõnez, & que vous auez mesme logez dans vostre propre maison, ayent fait vne grande perte en la mort d'un si digne Superieur, leur Compagnie neantmoins est composée de tant d'hõmes rares & eminens en sçauoir, que comme le feu ne s'esteignoit iamais dans le Temple des Vestales, il est aussi à esperer que ceste Societé ne defaudra point à l'Eglise, & qu'elle luy fera vne eternelle lumiere opposée à toutes les tenebres dont on la voudroit offusquer. De sorte que ces bons

Religieux succedans les vns aux autres, comme autant de prouins soigneusement cultiuez, ie diray d'eux, que *sigillatim sunt mortales, cunctim perpetui*, c'est à dire, comme particuliers ils nous peuuent defaillir : Mais considerez en general, c'est vn corps qui ne meurt point, & qui dure tousiours. C'est ce que i'auois à vous dire sur ce triste suiet qui vous afflige, & en ayant moy-mesme vn vif sentiment en l'ame, ie ne puis que me condouloir avec vous, & vous asseurer que ie seray iusqu'à ma fin,

MONSIEVR,

Vostre très-humble &
très-obeissant seruiteur,

PELLETIER.

A Paris le 22.
Mars 1626.

